

罪而佛降之若果降了則至今星辰不耀
度亦无造化夫謬妄之甚佛心高明則笑
其誰妄也詎上天星辰毀中國仙聖此輩
歷歷惡報都沒結果奈何迷昧不復傷哉
故真人神化記云吾之慧劍斬三尸六賊
貪嗔愛慾煩惱障豈肯取人頭況超禪師
與吾何仇故朱文公云君子仁慈猶克己
神仙安肯取人頭信哉吾教西化經所載
三十餘段事實故

宋仁宗贊云東訓尼父西化金仙又韓真
人度慧禪師入道為馮尊師真人紫陽真
人度道先禪師入道為紫賢真人又呂祖
師度有德僧十餘人皆實事傳吾教並不
彰耀誇矜因此人我之徒巧擬遮掩其先
生亦有參和尚者呵呵

純陽帝君神化妙通紀卷之一

純陽帝君神化妙通紀卷之二

帝二

歷試五魔第四化

玄門苗善時校正編次詩彖
帝君將別鄉忽見家人皆病死帝君心无悼
怛但備葬其忽病死者皆起无恙此一試也
一夜忽劫盜數十各持刀杖勒逼財物少頃
家中財寶撻盡而去帝君並不動聲色任其
所取此二試也次別鄉里三兩程迷路抵暮
遙見燈明遂往見草房兩間一老者携取魚
網出帝君向前揖投宿老者曰我子然一身
乘夜取魚推托再三遂開門言秀才自欲我
去取魚令帝君閉門宴時忽一女子年二十
許叫門帝君將謂老者親屬開門此女携一
袱入門作禮云秀才妻夜晚迷路投一宿帝
君答此非我家我亦在此與漁翁借歇我亦
不敢留娘子宿女子云彼此客中一宿即去
何必阻宴夜深黑暗妾亦去不得百端妖媚
調戲又云妾家田產財物无數妾見携金寶
若干妾願與秀才為妻有何不可亦不辜負
秀才帝君默坐並不動心任女子百端至曉

忽開眼在一大樹下坐默自笑而起行此三
試也次至一渡春潦水溢得一小舟來遂求
渡上小舟將至中流黑風大浪雷電大雨俱
至浪濤翻滾小舟翻側飄蕩帝君瞑目冥坐
任生任死心若泰山將近岸小舟覆沉幸得
上岸人問何故帝君笑而不答此四試也次
夜至一旅舍約三更忽見奇形怪狀无數鬼
神有欲打者有欲殺者帝君巍坐一切不問
須臾有數夜叉押一囚血肉淋漓號叫仗劍
來前曰汝宿世殺我今日見汝可速還我命
帝君曰殺命宜也又何說焉引頸就殺忽聞
空中叱喝神鬼即散不見有一人撫掌笑曰
吾雲房也吾嘗歎仙才難得人之塵心難滅
吾之求人向道甚於人欲求我也故五試汝
子皆不動心然可以教子但功行未完全且
授汝鍊黃白秘方可以濟物利人待汝功行
滿吾來度子帝君曰得燒鍊口訣復問如此
則鍊成時久有變異乎雲房曰三千年後還
本質帝君慨然曰如此則必誤三千年後人
也某不願為也雲房曰子心如此三十八百

功行成悉在此矣

彖章曰夫人之厚貌深情此心最難測度故南華經云十事試之以得人周易繫辭以四等言辭而見人之情偽況學道修仙入大聖人手豈輕易矣故聖經云多易必多難聖人猶難之況我輩乎今觀我輩逆境則怒順境則喜塵心俗氣舊識熟境舉止常在稟賦血氣之性未解習俗之性未改分毫而大言闊說誇誕張皇揚眉豎目舉拂拈槌舒拳豎指敲喝叫喚熱亂狂放百端情態而云本然天性一徹頓超正所謂抱贖叫屈掩耳偷鈴徒自欺昧深可憐哉正陽帝君以惡魔順境歷試不一純陽帝君心一玉虛凝然不可動搖再以黃白之術云立功行亦不願為宜乎正陽帝君樂然撫掌而接引矣我輩輕心慢意小德小智而為自了徹聞此歷試不動胡不寒心

神變傳經第五化

正陽師真曰吾所居終南鶴嶺洞天子能從

我遊乎純陽帝君曰願侍鸞儀師自携真人手偕行繞數步而恍然雲飄風送經歷山川頃刻至鶴嶺洞前有二虎師叱之去俄門開有天丁侍衛見琪樹珍葩祥雲瑞霧中朱丹金釘玉臺寶殿瑤階金閣二仙童迎師入瓊堂正坐帝君侍坐和氣如春景物非凡少頃仙童十數持元和瓊漿仙果貢獻舉閑坐間帝君避席問曰此何洞天師曰此吾師東華帝君舊館少陽洞天帝君再拜問曰修仙有幾種何功得至此師曰修真有一十五品仙人略言一二如明悟世間生滅不常幻妄俱空塵心頓息本性圓明此名清靈鬼仙法天地昇降之理效陰陽消息之微假身心為鼎爐以精炁為藥物五蘊皆空七情泯息久色身輕健法象飄然此名靈明地仙情慾皆泯愛識頓消此心明了一性虛無以太極為爐天地為鼎鍊元精息元氣凝元神三元混妙一真體玄恍惚象先超然未始鬼神莫測變化无方此名神仙神炁妙融變化莫測混然无狀性命玉虛體一太空真空不空大

象无象逍遥无極游泳先天頓超虛无自然玉清真境此名天仙帝君問曰此總謂大道乎師曰大道无形无名无問无應其大无外其小无内充塞宇宙運化古今不變不遷无生无死不化而化不神而神希夷微妙清虛自然不可致詰子其勉之忽有二仙人金冠霞帔玉佩雲裳捧玉詔金書召九天金闕選仙使鍾離某赴蓬萊上宮瑤池仙會師迎詔真人遂獻一詩得道來來相見難又聞東去上仙壇杖頭春色一壺酒頂上雲攢五岳冠飲海龜兒人不識燒山符子鬼難看先生去後身須老乞與貧兒換骨丹此詩恐師去急不回也師笑於袖中出靈寶昇玄清炁護命經一卷付真人再囑曰此經乃師東華帝君授受中言真空重玄之妙剖劈有无色聲妄幻子當熟味吾不久回珍重珍重彖章曰谷神不昧曰靈元炁融中曰實微入玄關登上境曰昇玄心息混融保合太和曰護命經中自衆生沉滯聲色迷惑有无至若知空不空知色不色名爲照了始

達妙音識无空法洞觀无礙入衆妙門自然解悟離諸疑網不着空見已上言辭簡當性理雙融盡三教性理真空大藏關要悉備於此經奈此輩日誦爲常更不參玩真味徒爲多端見解誠可傷哉師真始指鬼仙地仙神仙法度後授此經豈不有意外之妙乎學仙志士誠心咀玩可矣

明玄體道第六化

正陽真師赴會旬月餘回至洞天帝君喜迎再拜師曰子在於此岑寂數日得无欲歸乎帝君曰某塵緣既斷俗係已消既心志道更美有家山之思乎師點首安慰帝君問曰魂魄冥冥至理幽深何以全真師曰慧燈冥冥奉定神靈神既混合豈不契真金形玉質本出精神法象飛昇就付口訣云云

帝君再拜謝時洞中金光明耀清蒸雅和帝君九拜長跪曰某嘗玩諸仙丹經卦象異名多有疑心望師慈憫愚蒙一一細詳開發師曰心本无迹疑從何有且天地未肇父母未生道之一字亦是強名何卦象異名之有子

既有疑不妨拈出帝君曰丹書言修金丹何謂金丹師曰金堅之喻丹圓之喻即爾本性圓明堅固是也問曰性命一乎二乎師曰不可謂之一亦不可謂之二一點靈明无味性也一點元氣常調命也性无命則无依倚亦不能安止命无性則不冲融亦不能固密二物混融一真玉瑩性也命也俱強名爾問曰何謂水火元神火也元蒸水也神蒸混融融則水火既濟也問曰何謂真陰真陽答曰身中一點元精真陰也一點元蒸真陽也精蒸密融則陰陽混合而爲純一之體也問曰何謂坎離答曰即前陰陽水火之象也陰中陽坎也陽中陰離也取坎中一陽復離中一陰則成純陽乾體也問曰何謂一陽生答曰身中元蒸元蒸生發時也靜極一動便是一陽生也所以道時至神知至此時也淵清息念含光内燭自然三宮升降道德經云綿綿若存用之不勤以致純全皆自然而然泥於子午四正本生時皆妄爲也所以不知常安作凶也問曰何謂火候答曰慧火蒸候也心

息相依綿綿温固文火候也情生念動剛志力反武火候也問曰何謂藥物答曰元蒸元精也問曰何謂爐鼎答曰身爲玉爐心爲金鼎也問曰何謂玄關答曰至玄至妙之樞機也又謂玄之又玄最上重關也元神凝中強名神谷元蒸息中強名玄牝假喻身中玄竅虛无之谷也元无定所不有不定道德經云谷神不死是謂玄牝即此妙也問曰何謂青龍白虎答曰性屬木故喻青龍情屬金故喻白虎金能剋木故情多損性誠能攝情歸性則金木无間而爲一自然龍虎伏矣問曰何謂龜蛇即前水火陰陽之象也問曰何謂鉛汞答曰心與蒸也心猶汞之難死誠能息蒸養心則心死而性圓明虛心養浩則蒸息而命无漏矣鉛能制汞故聖人假此二物爲喻教人易爲修真至於八卦五行皆假喻以歸元四象三才悉強名而達道汝能死心息蒸息蒸凝神蒸神一混心性一源身外有身體一玉虛這許多評論都是太空雲翳鏡水塵風汝其頓徹力行自然而然其人拜謝

承章曰師祖此篇問答歷代聖師心心密印秘授仁德志士戒勿輕示常人愚凡生慶幸得遇心傳時默敬味焚香九禮假空感謝言言金書玉字寶珠乃修真最妙妙之上義心明性養之玄微慧命真空之妙用盡在是矣愚昧此當默歎世傳靈寶單法鍾呂傳道集謬妄之甚乃要名尚奇之士為之或云施肩吾作亦未知是否又有於偽書中取用作集作記證事證理而為傳道根源真乃并蛙耳認賊作兒指石為土以盲指盲無廉恥之甚矣愚亦不敢多言自有別實者在焉

密印劍法第七化

正陽師真宴坐間而謂純陽帝君曰修真體道全憑慧力堅持入妙造玄先要志剛決烈所以極終極始天地莫遷大用大機鬼神莫測故聖人携寶劍倒斡璇璣仗剛鋒直摧魔怪故有劍法之喻也此劍也採无極至精合先天元炁假乾坤之爐轉運元始之針鍊慧火煅成靈泉磨利以太極為環剛中為柄美

利為刃清淨為匣虛白燦爛純粹堅剛運造化之機秉仁威之令舉之无今古按之无先後六天神鬼歸降三界妖魔乞命破煩惱障絕貪愛緣斬七情誅六賊斷冥怒勒去邪事物來前迎刃而解藏之身可以无生死體象先攝之政可以鎮國家清天下光輝善利圓混剛中奸邪一見寒心外道繞開破膽子當精進圓成橫向太虛凜凜帝君受此劍法至敬禮謝輶光晦迹密降華峯強名曰先天遁神劍

教門善時得此劍篇咀玩不勝真樂遂作慧劍吟紫極洞中傳劍訣不屬陰陽不用鐵先天元炁煅鎔冲鑄成便會誅妖孽得煅鍊經琢磨利勝鎔錐及大阿捩在手中龍虎伏收歸匣內炁神和斬三尸誅五賊勦滅七情并六慾貪嗔愛鬼悉消亡昏散魔軍皆滅沒亦能生亦能殺生殺成權流電星事物來前迎刃解憂疑暫起逐鋒平吾呂祖仙得此劍開闢乾坤成一片死生絕斷體金堅隱顯无方時變現救死漢活

駐體神仙安肯取人頭野狐巧撰購愚鄙丹鳳何嘗怪黑鷲伏天魔降外道萬法千門一劈掃威鎮太平沒價珍德清宇宙无窮寶此寶劍常隨身藏諸用顯諸仁絕如美玉无瑕墨瑩似水晶絕點塵此寶劍无中有太上親授東華手諸祖列仙密密傳得之慧妙光星斗掣金電按玉龍出入縱橫現六通雪刃光輝无極内霜銚明燦太虛中平天下齊家國等閑一舉世清肅忠良賢聖盡歸依奸佞逆邪皆剪戮諸佛祖衆仙真若无此劍道難成割除人慾全天理掃蕩風雲昇太清

純陽帝君神化妙通紀卷之二